

## Úrskurður 18/2018

A og B kærðu í sameiningu ákvörðun Tollstjóra um synjun á tímabundnum tollfríðindum vegna ökutækis með erlenda skráningarnúmerið X. Kærendur töldu sig uppfylla öll skilyrði fyrir tímabundnum tollfrjálsum innflutningi en hin kærða ákvörðun Tollstjóra byggðist á því að kærendur væru fluttir til landsins og ættu því ekki rétt á tollfríðindum vegna ökutækisins.

Tollstjóri leit til þess að um væri að ræða undanþágu frá meginreglum tollalaga varðandi greiðslu aðflutningsgjalda og sem slíka bæri að túlka hana þröngt. Farið var yfir réttarheimildir sem snúa að tímabundnum tollfrjálsum innflutningi en þar kom fram að réttur til tímabundins tollfrjáls innflutnings ökutækja félli niður tæki innflytjandi upp varanlega búsetu hér á landi. Til skilgreiningar á hugtakinu búseta var litið til laga um lögheimili en þar kemur fram að lögheimili manns sé sá staður, þar sem hann hefur fasta búsetu. Þar sem kærendur höfðu flutt lögheimili sitt til landsins, ásamt því að hafa notið tollfríðinda sem fólk sem flyst búferlum til landsins, var það mat Tollstjóra að kærendur uppfylltu ekki skilyrði fyrir tímabundnum tollfrjálsum innflutningi ökutækja sem aðilar sem koma tímabundið hingað til lands.

Var ákvörðun Tollstjóra um synjun á tímabundnum tollfríðindum vegna ökutækis með erlenda skráningarnúmerið X, því staðfest.